



Palonguos "Miegovuos" ansamblietee "Baltika-94" pestivalie

**TARPTAUTINIS PUOLKUORA FESTIVALIS "BALTIKA" — TRADICINIS, KUOŽNAAS METAAS VYKSTOUS RĖNGINYS.** Pakaituoms ons puolkuora gerbiejus sovadėn taa i Latvėjė, taa i Lietova, taa i Estėjė. Anamė dalyvaun ne tik tū trijd šaliū puolkuora ansamblee, bet ėr puolkuora kuolektyvaa iš kėtū valstybiu. Perna "BALTIKA" prijėmė Lietova, vuo sees meetaas — Latvėjė. Tėn Lietovaa atstuvava Palonguos "MIEGOVUOS" ansamblis (vaduvė Baniulaitė Zita). Šventie dalyvava ėr žemaitiu kultūras draugėjės Telšiū pavietia "Insulas" puolkuora kuolektyvus (vaduvė Ričkutė Milda).

Miegovėškoms tuokė garbie bova soteikta ož dėdėli darba, katrou anėi nodėrba pernaa, kaa "Baltika-93" pestivalis vyka Palonguo. Ansamblis per paskutinius metus dėdlee sostėpriėjė, papėldė sava repertuara naujees kūrėnees. Gražee "Miegova" pasėruodė nee tik "Baltikas" pestivalie, bet ėr sees metaas vykostuo Pasaulė lietoviu dainū šventie. Vėlniou, baigemajemė puolkuora vakara kuoncertė, anėi yvedė ėr, kaap Paviluonienė Veronika poikėe pavadėna tuo šventė dalyvavusius puolkuora kuolektyvus, "žemaitiu polkus". No, vuo "Miegovuos" kuolektyva geruoje dvasė-palongėškė tautodailininkė, senūju tuo krašta dainū pateikiejė ANDRIEKUTĖ REGINA. Kėtuos tuokiuos pasakuorės, dainininkės pajūrie nerasi. Tad ana Pasaulė lietoviu dainū šventės dėinuom vaduvava ėr žemaitiu tautosakas pateikieju ėr atlėkieju "polkou", ka ons karto so kėtū Lietuvos regėjuonu dainininkaas, mozėkantaas, pasakuorees bova sovadints i Lietuvos dramas teetra. Aple tas praėjės gražės šventės pasakuo pati ANDRIEKUTĖ REGINA.

X X X

Laiks baisee greitaa lek ir jau praeitės vasaras karštee, katrėi kaap nikumet onkstiau šees metaas nusekėna ežerus, opės, šolėnius, sudžiuovėna žuolė, katra palėka kaap lapės oudėga rauduona. Net mediu lapaa per tus karštius bova seseraitė, lygo būtu prasėvieroši pekla. Kėntiejė kuožnos gyvs sotvierėms. Ontaa net šarka barė moni, kə kuožna ryta meta liuobo ožmėrštė pripėltė luovalı vondėns atsigierėmou. Nikuokėi dyvaa, ka liuobo ėr ožmėrštė — apėnt tas karštis nusekėna, mosiet, ėr mona smaginis. Dabaa, kaa jau vėskis bėngies, mintim vės sogryžo i tou karšta vasara ėr mėslėjo aple tou, kas bova gera. Pėrmuo eilie tas gers yr šiuos vasaras senūju dainū šventės — puolkuora pestivalees vadėnamas. Vo jee aple tū pavadėnėma, tad ons monėi nadėlėlee tatink. Žemaitėškaa tad dar ėr pasėčydytiuo-polk-luok-baveik. Kas ėe pol ėr kas ėe luo? Rasint, sakau, navartaliuokem lėižovė ėr tas šventės vadinkom senūju dainū pasėdainiavėmaas?!

Vo dainiavuom šiuo vasara na vėina ėr na do kartus. Dar bėrželie bovuom Vėlniou, "Skomb, skomb kanklee" šventie. Prasidejė ana Švėnta Juona bažnyčiuo žemaitėškuom ėr aukštaitėškuom gėisimim. Tėi pasėgėiduo-jėmaa lygo atvierė vartus vėsam sobovėmou. Kretinguos šėšė gėiduoree gėid ėr po šee dėinaa pagrabūs, par dėliuosės šventės — Velyku naktė, Švėnta Ontuona atlaidūs, vo, žmuoniū prašumė, per atmėnėmus — Kalvarėjės Kalnu gėismės. Gėid tronkee, dėdėlees balsaas, stuoraa, kaap trūbaa. Aukštaitiu

gėiduorkas dėdėlee dailee, tėivaas balselees ėšvediuojė aukštaitėšku gėismiu meliuodėjės. Tėk monėi, kaap peliedaa, gražesnis sava vaikūktis — žemaitėška gėismė jou smėga i patė šėrdė...

Tuo šventie dainiavuom vėsė, šuokuom vėsė, kėts kėta muokiem sava dainiū ėr pasėšukėmu.

Nėbėlgaa trokas, lėipas pradiuo, bova Pasaulės lėitoviu dainiū šventė. Ėr viel anuo "Miegova" dalyvava senūju dainiū dėinuo Serėikėškiu parkė ėr ont kalna Gedėmina, kor skombiejė ėsturoėškas vajuonas dainės. Švėntuo vėituo balsos pats plaukė, bovuom lygo paukštee gėiduodamė. Tuo šventie dar bova tuoks senūju žmuoniū dainėninku sobovėms Dramas teatre. Atvažiava aukštaitė, žemaitė, sovalkaa ėr džiukaa. Sosėsiedė kuožnos ož sava stala baveik po posvalondi dainiava ėr gradėjė sava mozėkiausės vėsuokiausės maliuodėjės. Ruoduos, žmuoogos sokumpės, sosėrėitės i bėtė, so lazdelė led be pakrūpštėnė, vo kad dainiui, ožmėršt vėskū. Skombiejė senuosės dainės, atvėžtas i Vėlnio ėš vėsū mūsa krašta pašaliū. Bova kaap dongou — šėrdės džiaugies. Vo daugiausee i šėrdi krėta senuovėškas dainės, katras dainiava tievs ėr sūnos Samošee ėš Kelmės. Dėdėlee pagėrėntas tas anodoms dainiavėms — pasėruodė, ka tēkrė žemaitėe yr! Dainiava teep aiškee, ka būtom galiejosės ėr lėmpas gestė. Nabdaug šindėin rasem dainiuojintiu šeimū, vo mona jaunystės metaas tas bova kuožnuo šėimynu.

# TA VASARA NEOŽMĖRŠTAMA...

Dailee padainiava ėr devinta dešimti pradiejosės Grėšienė ėr Kvėlienė ėš Muockaitiu kaima. Neprastesnės bova ėr loukėškės Duomeikienė ėr Andriuškienė. Žemaitiu stala mozėkonts Juonošos Ontuons so sava banduonėjė atstuoje bėnt tris mozėkontus — tėik mitree anuo pėrštaa lakstė po tus mozėkas gozekelius. Aš klausiaus ėr vėn mėslėju, kad bėnt imtom tū vėskū i galvelės ėr šėrdelės baaugotėjee jaunė vaikiokaa ėr mergėkės. Ėr ont tuos mėslės sobiega pri senuoliu daugybė jaunū vaikūktiu, dainiuodamė mums, senėisėms, ėr po gielė duovanuodamė. Vo tuos anū dainiuojemas senuosės dainės bova tuokės gražės, ka na vėinam ėr ašara ėšrėitiejė basėdžiaugont. Aš nieka nebesakau aple koncertus Sarėikėškiu parkė ar Katedros aikštie kor bova. Lėitova vėskū tū galiejė matytė par televizourio. Vo kas napaslinka prisiestė pri anuo ar nagaliejė pamatytė, ėšgerstė, lai grauž nagus — dėdėlee daug nustuoje.

Tėktaa ka tou mums senūju dainiū pasėdainiavėms šiuo vasara nabėngies. Kuožna vasara Pabaltėjie vyks tarptautėnis senūju dainiū pasėdainiavėms "Baltika". Šymet tas bova Latvėjie, Ringuo tataa. Sovaziava estaa, norvegaa, soomee, švedaa, danaa, škuotaa, ėš Fareru salū žmuonės, panašė i eskimuis so kailėniems kelniems, veltėnees bataas, ėš karuolieliu padėrbtuoms dėdėliems gražiems kaseliems. Nu Lėitovuos bovuom kvėistė mes, Palonguos "Miegova".

Vėsa nedielė dainiavuom, šuokuom, klausiemės, kaituom saulie. Vėsa "Baltika-94" šėrdės bova Saulė ėr apeigas, kor mūsa baltu pruosenuolee garbėna Saulė, Vondėni ėr Kūli. Daug latvee tor tuokiū dainiū. Šventie bova daug ansambliu ėš vėsū Latvėjės kraštū: Kuržemės, Latgalas, Vidzemės. Bovuom Daugpėlie, par vėsa Latvėjė(nu pat Ringuos) nuvažiavuom, vėsor dainiavuom, šuokuom. Sogryžont nuvežė mumis Latgalės žemie i Preili miesteli. Po koncerta, nemėi važiuojint, karštė nebttverdamė, šašoulietė baėiškuodamė, pamatiem sena bažnyčelė ėš kūliu pastatyta. Iejė i vėdo, ramee pabovė so sava mintiems, somėslėjiem pagėiduotė "Puonė, Karaliau Dėivė Abraouma", prašydamė lytaus. Jouks joukaas, bet kėta dėina nu pat ryta geraa nulejė — bovuom šlapė, kaap žvakės. Musiet, Pondėivalis ėšgerda mūsa prašyma...

Ringuo kuoncertavuom pri Duoma katedras, Tautuos nomūs, vo Dzegužkalnė parkė oždariem vėsa tū sobovėma.

Senuosės dainės yr kaap tēlts ėš anuo laikaa. Luopykem, kyluokem tū tēlta kas gyvs galis. Anaas laikaaas žmuonės dainiava dėrbdamė ėr varga vargamė, myliedamė ėr kėntiedamė. Eedamas ėš pat šėrdės gėimies dainės yr patės tėkriausės ba kuokė malavėma ar ėsmėla. Dėl tou tuos dainės yr kaap vaistaa ėr tam, kas anas dainiui, ėr tam, kas anū klausuos. Gyda tas mūsa brongiiaus pruosenuoliu palėkėms nu dvasės ėr nu kūna nagalės. Tiktaa klausykemuos ėr tonkee pajosem šiorpi, babiegonti par nogara — tataa mūsa dvasės kopra, igauta nu napritekliu, ėšsėtėis toukart.

ANDRIEKUTĖ REGINA